

四庫全書

集部

欽定四庫全書

集部

冷然齋詩集卷二

詳校官庶吉士臣李傳熊

主事臣呂雲棟覆勘

謄錄監生臣南光祇

謄錄監生臣龍舜耕

欽定四庫全書

集部四

提要

泠然齋集八卷

別集類三

宋

臣等謹案泠然齋集八卷宋蘓洄撰洄字召

叟山陰人右僕射頌之四世孫宋史頌傳不

詳列其後裔故洄始末無可考陳振孫書錄

解題有洄泠然齋集二十卷亦久亡佚惟宋

無名氏詩家鼎鑪中尚存其二詩而已今從

永樂大典所載採輯排比共得詩八百五十
餘篇釐為八卷即詩中所自紀參互考之知
洵少時即從其祖遊宦入蜀長而落拓走四
方曾再入建康幕府其書懷詩有云昨蒙宗
公置牙齒事下丞相當審覈薦才不堪駕十
乘爝火或可繼殘夕則嘗以薦得官而終偃
蹇不遇以老生平所與往來唱和者如辛棄
疾劉過王柵潘檉趙師秀周文璞姜夔葛天

民等皆一時知名士集中又有送陸游赴修
史之命詩云弟子重先生卅角以至斯文章
起嬰慕德行隨蕭規是河本從學于游詩法
流傳淵源有自故其所作皆能鑱刻淬鍊自
出清新在江湖詩派之中可謂卓然特出其
金陵襍咏多至二百首尤為出奇無窮周文
璞為作跋以劉禹錫杜牧之王安石比之雖
稱許不免過情要其才力富瞻實一時之秀

也惜原集久湮錄宋詩者至不能舉其姓名
其輓姜夔一詩元陸友仁硯北褰志引之以
為蘓石所作近時厲鶚作宋詩記事遂分蘓
泂蘓石為兩人今考是詩猶在泂集中殆必
原書題作蘓召叟傳寫者脫去叟字又誤名
為石遂至輾轉沿訛莫能是正倘非集本復
出竟無由訂定其紕繆則晦而復著亦可云
泂之至幸矣乾隆四十六年九月恭校上

總纂官臣紀昀陸錫熊臣孫士毅

總校官臣陸費墀

欽定四庫全書

冷然齋詩集卷一

宋 蘇洵 撰

五言古詩

夜讀杜詩四十韻

夜讀老杜詩如對老杜面此翁歷艱難往往詩中見曩
吾游川蜀所恨年數淺草堂聞無人正在成都縣斷碑
蝕苔蘚捫讀知幾遍尋思隱其下終日弄書卷庶幾平
生心所得未應面親庭宜行在歸計乖初願言瞻浣花

里卮水乃缺獻人間畫圖樣皮骨恠豐腴京華四十載
褐短更驢蹇至今彼堂上唇綻齒微現獨餘雙眸子利
若秋江剪因何太瘦生貧賤恐不免耒陽一盻炙飲食
知味鮮後人美肴膳出語穢蝦蜺那知獨角龍妙用天
行健至其得意處力幹造物轉神雷破潛穴霹靂飛雨
片武夫荷戈戰颯沓旂鼓偃蛟鼉吐波浪宗廟羅黻冕
鞭車甫平陸梯磴忽絕巘又如虛空內一氣五游行有
足恣馳驅不行渠自遠蒼茫鬼神會慘慘顏狀變春榮

與秋悴時節隨晦顯鳳鳴朝陽桐諸鳥徒巧轉關雎樂
不淫小弁親不怨此身付天地寧作青紫檀低頭向嚴
武陵辱非所便百年稟忠孝句法老益練君看夔州作
大冶金百鍊麟經示褒貶比物足懲勸蜀山上摩天蜀
水下如線山川蘊精異翁句麗而典荒郊夜徂半隔巷
聞驚犬分明夢見翁握手一笑倩殷勤得軟語意若深
予眷文章致隆貴嗤點到羣彥何當同宗文相與携筆
研

寓言二首

精神徧八方一散或爲風堂堂世之人奈何總虛空我
無騰化術正爾不能從回視恍兮惚老子其猶龍

函關度青牛生在空桑中藁砧未刀頭妾身變山峯三
年化爲碧是血本來紅古來埋直氣曾見吐長虹

口占

士生弊於文其實乃無用今年州縣間朋友多不貢桔
棹旱而工已得輕抱甕大舜舉臯陶乃曰選於衆

題藥城第三集

百金買一書我心胡不喜自朝至日暝耽玩無窮已復
慚文未老年既三十四更後四十年未必辦茲事

擬古

曾城上岵嶇樓觀切星辰其下視九州我行屢秋春道
逢兮美人遺我芳蘭蓀蘭蓀不可佩飲水代朝餐仰看
雙飛燕起勢何翩翩顏淵稱賢者樂在簞瓢間美人捨
我去此去何時還怵怵思徒抽惻惻聲孰聞

見懷

顏淵樂簞瓢曾子曰三省閉門謝往還安此寂寞境
閉
來愛我地止渴望梅嶺玄談破月脇心對日光炯榮枯
百年事如一彈指頃吾儕各老大妙契形問影回味久
乃知酒固不勝茗

吾廬

陰陰處士廬寂寂閉門居頗安顏氏子敬謝陶胡奴可
使龍作魚不使馬爲駒詩成有奇氣浮雲時卷舒

郊行弔古呈友人

荒齋讀書罷出門步青春春風扇微和冠者五六人登
高恣遊目行邁靡其因平湖半疆畎王謝亦齊民父老
談古先觴客酒濡脣歸同牛羊夕懔懔難重陳

春日獨居感懷

昔我金陵歸感此芳歲闌入門見兒女愧色蓋愁顏從
人竊餘瀝俯育良已難居者瓶盎空行者衣裳單豈無
一杯酒持慰汝荒寒所知不相待各去爲蒼山我生轉

無聊終日自閉關門前春風來草樹向
爛斑舟車載游冶類聚極相歡而我懷
所知所得心未安晨興亦扶杖十步九思
還言瞻山頭石安得如汝頑

春歌

山人昨日到野棠連夜開啼鵲背山去
流鶯度水來草長留款步花殘勸餘盃
於焉早復暮行坐摘青梅

奉謝唐子耆及兩馮君載酒寵臨借屋

年事半七十躬耕吾本謀讀書詎云然
迺與世爲讎維

我先人廬雨風行蝸牛假此以適我得無歲云周永懷
鵲有巢寧久居夫鳩食飲所不忘歸焉買林丘進退孰
我能萬間子無由愧子撫我厚感子非有羞

奉寄子高廬兄五十韻

君才如驕驕道里未可量讀書串脉絡如海東赴洋五
年隔異縣信若參與商昨者戒車馬故意改未嘗我家
小於斗下榻出倉黃繩樞三椽共君視猶雕梁貧又少
甘脆而君甘粃糠晨興烏鵲先夕憩星宿張上言體金

玉時節登虞唐下言復家世努力事文章瑣細及兒女
骨肉誼莫當君來厯州府所在諸侯良肝膽皆善子子
去雖脫囊問胡獨善我風雨度錢唐我時熱君指又不
羅酒漿何況動隣里磨刀向猪羊青燈兩夫影陳義勸
交相謂言經時留十日又理裝但携本經冊沃州山水
鄉子寧舍我去我意未子忘相逢一歲短相別一日長
何緣子吾所不然我君傍君雖老馬姿今乃驥服稍刷
燕日千里濶步徐康莊江水有時西東下斯濫觴齋齋

至澎湃穿溜極懷裏死生渠有命貧賤士之常孔融委
曹操汲黯卑張湯人生出處分榮謝均陰陽念我懶拙
病久已在膏肓此方因憂患懲艾百戰創安時而處順
天道不可詳魯連蹈東海屈原賦沅湘此志竟未遂眼
看都茫茫君懷萬金產待價空四方古聞韞櫝貴世有
別足傷藍田種洵美死鼠名須防魯方秉周禮漢亦絕
楚糧易求哥舒翰難覓張子房英雄出儒素金印垂欄
裳吾祖元祐末奉使讐戎羌子孫失遺武史冊無晶光

君家著膽略並驅從兩狼彎弓射敵首滅敵使走藏此
事屬乃翁翁今膺力強問翁來何時九月天雨霜此時
君適我促膝話繩床作詩致近訊願子益自將君看繞
指柔會作百鍊剛豈云建厦缺期子柱明堂

次韻賴叟弟耕堂即事

聖賢畏虛名蠻貊有誠服仕雖志溫飽鮮不餒其腹爾
來讀書者妄意天雨粟東臯春一犁往哉駕黃犢

耕田可無田耕道豈得道物生豈區區天意非草草林

茂鳥知歸水清魚惡擾勿謂小人哉請學樊須老
儒冠誤終身其始從上士頭白賦歸來不腐已其次我
今戒兒姪萬卷易雙耜向使微阿連幾敗乃公事

江上遣心

風帆等駿馬突出不受羈羣山望如豆轉眄羅窓扉頃
居長安城小駟驅以馳塵埃困煩促滯留費憂思不知
葭葦鄉閭此天地奇鷗禽亦佳尚潔身固我師下上萬
頃光夫豈矜其私物生各有適我適君無之掀髯倚柁

樓一笑了百癡商歌詎成音逝者方如斯

題松鶴

鶴鳴松樹顛人行松樹下人禽兩無屬往往俱物化
明日還獨來寂寞青松夜擾擾征途間誰是知音者

晨起長哦後山秋懷十詩飲水一杯清寒徹心
長哦十秋懷清韻繞屋梁曲逆有餓死英布刑而王向
來爲長公甘受三徑荒一身詎無餘百年信難量

邊頭嘆

邊頭奏涼風戰士送寒衣北征夏徂秋君王虛六師區
區彼敵人授首詎無期冰霜輝戈甲勇憶臨去時去去
思樹功寧復顧家為指揮在將軍坐作看旌旗謂是白
沙漠那知青草陂當時均死力顧乃用之非

春日起晚

春風散百物和暖氣難清晨衾四肢倦欲起還不能展
轉卧成晏起聽百鳥鳴幸然無公事且復寡經營妻兒
悄不喧日午閉柴荆羹魚就鮮買軟飯熟香粳雖然媿

茲食賴爾王化成出門步原田最愛莓苔青半生果何
爲悔不學躬耕把鋤如把筆冀獲尚何曾還復茆簷下
所思良友朋青雲固云樂倚伏諒難明那無託衰懶緬
想川上情物我均所役聊復安其生

次馬季思十韻

巷內有佳人其志介如石沉酣數千卷徑草無行迹秋
清入肺胃籬落牽牛碧詩成錦繡段裁剝非刀尺如聞
急徵召厚甚帛加璧毋庸北窓下細字朱黃釋嗟余世

無用痛飲時墮憤思君不相見誰與浮大白中年友朋
減生意天壤迺何時樗隱園容我分半席

詠懷

初夏腓草木園綠勝春深微雨灑高棟好風吹我襟徘徊
花下徑獨往翫層陰東西燕雀飛寂寞鸞鳳音人生
積累資培塿升高岑陳力正不能前修愧周任何時歌
物阜薰兮入舜琴俯仰終所爲於以達吾心

送陸放翁赴落致仕修史之命

先生天下名有耳誰不知區區以蠹測于海徒贅辭第
子事先生卅角以至斯文章起嬰慕德行隨蕭規昨聞
掛衣冠固共識者疑豈期平生學終鬱不得施先生健
而武神志元未衰每登漁隱堂再拜奉履綦留我坐終
日誨我忘其疲送我出重門行步又若飛或捉筆大書
或脫口賦詩或時幾酌我自倒金屈卮我出謂客言先
生壽期願上爲天下賀下以賀吾師在郊一角麟藏六
五總龜先生固高世而世肯我違情知渭濱載謾道淵

明歸果然一札下未覺十年遲堂堂孝廟史當代誰宜
爲二十八年間凡事公見之英靈果在天筆削詎敢私
矧惟陛下聖益重黃髮咨湖山晚無用遭逢乃今茲先
生顧謂我萬物各有時

歸越中所居

閑居寡人事棲遲倦所務雅志歸去來青山越中住爰
辭翫往聖門蔭資先祖雖云隱遁情尚眷諸親故歲時
酒一尊聊樂我東土采蓮樵風徑看竹蘭亭路心亨體

攸適干祿靡希遇百年儻有程庶近嚴光墓

用陶已酉歲九月九日韻

壺樽湛名酒四散會朋交黃菊雖未開翠木亦已凋
駕言彼墟矣佳處聊登高山晴歛將夕宇淨豁層霄
迨我色笑同息爾筋力勞人情旱欲濡來蘇慰乾焦
儻然隨運往冥契彭澤陶有花即重九何必須今朝

和陶九日閒居

斯人鮮常在奄忽便一生茲辰俄重九令節誰所名
把

菊見南山吟詩憶淵明素琴不具絃大雅留遺聲伯始
真糞土飲水空遐齡異時東坡下尚有酒可傾才難信
遇否物變更枯榮此翁獨醒者貧賤胡爲情悵焉服九
華覓醉何由成

擬古

煌煌庭中菊秋後各已花玄霜下蒼葉憔悴同凡葩采
之或傷生不采謂我遐貴賤詎不然無已安其家蕭條
陶彭澤歸去隨風沙自古有如此我何良歎嗟季倫昔

富貴舉國稱石家千金買綠珠歌舞笑春華醉歸擊珊瑚恨不窮驕奢黃塵洛陽起里第生桑麻仲尼卒旅人歷聘空摧車古來竟何爲不見東門瓜

日月遞相見玄髮驚蹉跎冥冥北邙路去者何其多妻孥聚歡樂志遠身已訛功名無富貴此路不可過可憐世上人刺促鳴干戈金尊幸有酒不飲將如何

漢光昔未遇頗爲兄嫂欺誰知韓王信本是屠沽兒他時築將壇意氣帝者師中興屏新莽長劔誅赤眉皇天

生一物大小隨其資例令饑與寒何以生育爲永言觀
厥成圓璧殊方圭天意定不爾變化應須時少小弄文
翰把筆能哦詩十五學綴文如蠶中抽絲青雲付達官
十九名新知南轅異燕路鄙笑無挈提甘心窮閭中疏
食黃瓜齏區區蠹魚習槁死不可醫間齋秉微尚高視
聖者師謾言苦如荼誰信甘如飴

自吾蜀中歸稍拂衣上塵古今名利場誤殺多許人歸
囊課宿有頗欲謀其身買花郡庠東結屋清鏡濱山田

不滿百濁酒當濡唇庶幾友生來談笑夜達晨此志猶未遂寬作明年春人生幾明年謹勿浪苦辛

往時尋芳興屢醉黃金卮日來酒量窄三盞忘東西雖然不多飲不飲還復思所以畢吏部千古遭嘲嗤每年梅花開如與粲者期有時棹孤舟間或借馬騎水村及山驛日炙仍風吹醉歸更有携研席相娛嬉今年墮塵鞅頗復踈濶之此君應有言亦曰好惡移淒涼殘年歷春到無多時如何江南岸不見開一枝

秋興

秋高朔馬肥壯士多感激起看天宇空萬物盡陰黑連
年稍艱食所至多盜賊人情有馴致世或尚姑息坐令
鼠子輩漸欲穴我室苟生各有養飛走隨所得教攘乃
如此彼計多變易我生無根蒂尚守祖父宅邇來時命
乖僕僕州縣客兩親化爲土弟妹各狼籍箕風度牕牖
蟋蟀催婦織貧家一匹絹已費幾蠶力夫妻僅補綴幸
寬兒女責復思後來事對酒不能喫人言有定數禍福

那可擇胡爲自慘戚三十頭雪白

貧居應閉門原憲乃非病讀書到周孔歲晚吾事竟佳
哉亦可樂妙在得所性於時俗慮少魚鳥共涵泳蘆花
深兩槩秋色滿湖鏡頗懷梅子真屢起泛舟興明當文
會友聖處一參訂此生飯不足敢不聽於命

耕堂弟雪中效宛陵仄字平字詩各次韻一首
旱澇數所繫累歛望一稔種秫秫不孕酌水水可飲甕
牖忽碧玉喜見月入枕閉戶請謝客是子亦太甚

山河無纖塵遙觀浮漚如穿廬惟青天油牕誰其糊狂
歌忘寒饑消流驚須臾煩呼瑤英徒同來泠然居

次邢兄韻簡李簡夫

幽花挹幽禪夷下難爲情想見獅子床天女問淨名至
味有不釀太音本希聲相逢寸紙間公案今見成

王千里得晉獻之保母碑及硯索詩

客從王家來示我王家物云是彼樵者墾山之所得升
沉有時節至寶不浪出祖先暨兒息嗜好俱第一青氈

未渠失近代無此筆觀其逼人處造次神品入石遺半
缺齧行草百十七昭陵不可及季孟精爽集天地倏開
張鬼神爲之泣泓也玉璧姿肯爲泥沙沒嗚呼黃耆殉
人事止枯骨臨池例飲墨有底鵝領識夫君矧其後妙
契過漂石居然今視昔年數正八百

碑云後八百載知
獻之係母官於茲

土

待潮通明詒友朋

子大瞻在前德允瞠若後自予得二士光彩生戶牖向

來九州內所在兩脚走相好亦已多惟子共辰酉老銘
最可人自謂禿非醜南宮棄之去盧氏真傑斗今朝通
明埭獨客對卮酒追懷平昔意幸不愧高厚春江散烟
露春事紛花柳問胡此淹留書卷空在手人生忌多情
所不忘朋友南北與東西同然一回首

送邢芻父赴漕試蓋予以牒遜之

長江我之愁倒嶽推不去琴瑟有淒怨居室等行路十
三出從師三十茲無成向來爲何事投老悲秋螢堂堂

文翰場攘臂君甚武丈夫貴高誼我得寧在汝達官總
遺恨所樂纔妻兒君堂有夫人祿養當以時吳山青入
天江水流到海才難嘆先聖戰伐偶今代四序看迭移
南薰已西風天命不可爲往哉及其鋒

次韻芻父試罷有述

筆耕亦農耕後種有先熟穀終貴於稗種詎不如桂里
門富驕兒昨者車擊轂一朝禍機至悔不初碌碌因而
利生鈍甚羨平爲福翩翩歸來賦寫壁仍畫軸有來顧

之唾謂豈好題目予方友鷗鷺渠自行雁鷺同參聽誰
詣勇往何待卜君才十倍我書已萬卷讀邊頭尚征戰
時事非曩夙雖遲劉蕡對肯效包胥哭

次韻高秘書

高郎水江漢波浪所從出讀書識大體於世無棄物誰
歎戒盈滿視彼歌器側如君執謙柄我不能萬一羣公
石渠上天子正側席翻然侍親歸袍茜髮黑漆老仙顧
之笑吾與子居越人生屈伸肘猶動靜語默非無鶴乘

軒亦有驥在櫪忠當盡臣節孝則共子職煌煌周孔意
千古照簡冊吾儕負君親但守不黔突

簡高秘書

昨日山中雲今朝山下雨天時或定數人事恐無據蕭
條吟梁父士有遇不遇不見龐德公移家鹿門去

坐睡

世事因纏糾誰能復自然看書得坐睡此樂出於天一
適萬慮遠重尋已非先相逢問尊宿會我無心禪

梁湖

路長人迹少日午樹陰正茲行廼無故解后得所性佳
眠離塵境此事安心竟晚飯過邑門未害喧中靜

正月五日謁放翁留飲歡甚

若人大槐中不作螻蟻夢春風鬢鬚綠文字凌屈宋昨
朝我訪之杯酒頗自奉魚蝦襟淮海狼藉蔬果衆妍譚
到嘲謔嘉我一笑共未言神仙事於世本無用但可於
世人矯首飛鴻送故公所言者大抵靜觀動胡能更八

金匱要略卷一
十異日亦高冢絕憐稽山下不逐梅笋貢堂前謾名龜
堂下或歌鳳壽公晚唐衣聊爲吾道重

哭小姪梅老

我初養栢兒年紀三十四
穎季得梅老歲數適我類而
梅生不凡頭骨甚硯異見之懷抱中宛有成人器漆光
眼目動玉雪皮肉細愛之甚於栢稍長望其貴每出偏
問歸祝父好看視猶嫌礙關鑰莫伴栢嬉戲固嘗約而
父築室更隣位請師共教授兒姪精六藝中年不如意

藉此期自慰庶幾和仲老他日遠虎侍梅胡不佳實飄
謝許危脆更醫再而三歷齒一十二留之苦不可去我
何乃易而父真斷腸汝伯重垂涕爾梅竟何往小楷但
遺蛻登槃莫薦子登隴休折寄云然我所傷畏是爾名
字梅兮早歸來尚作梅花弟

舉子

先親去無歸家有十男子春秋此堂上拜起共祭祀一
貧乃青氈書種幸未已人言抱子晚君已三十四何時

見入學況未保韶稚老年樹松栢仁者用其意父母養
我時辛勤五兄弟蜂房今俯育誰則逮菽水昊天真罔
極夢想九原啟恭惟父母心敢不嗣遺體平生忠與孝
舉動法經史先訓吾所知功名蓋天爾

癸亥歲五月望日紹興獄有罪人十二逃以出
勢甚恣官吏相顧失措府出軍追至山陰界上
魯墟獲其八翌日以其二尸諸市先是有諸暨
縣民孫破面者以販鹽傷人既即刑又他日某

即刑今死者斯張氏第六又其黨之雄也聞又有唐花者捕未獲其獲殺之何疑適時天雨不已邦人不堪安作魯墟行以示在官者

今茲水用事簷雨四十日禱祈遍羣望魚鱗入家宅小民例煎迫在在絕粒食聖人制邦國休養覲生活本根者州縣父母資牧伯夫何失其理致使爲盜賊犯之復無赦恐負天地德昨來諸暨變本以醯故得有司屢殺戮勢欲與之敵民生各良性豈獨肆凶慝饑寒迫於後

妻子時動色那知刀鋸威乃甚溝壑厄市人起相戰爭
利初毆擊吾非志剽掠解后有其迹王官亦人耳聞此
宜隱惻不然罹憲網無暇謀復出嗚呼不得已天下蓋
非一橫尸類雞狗斬刈遽狼籍頗聞動官軍餘黨收捕
急儻非勸本務有死民不易是時天復雨省宰到層畢
夫民使之飽不飽亦吾匹丁寧善其生淚下死魂魄

夜坐讀常蘇州集序

茲辰孟春夕芳意二分在登臨愧成晚倏忽朝晡改樓

欄帶棲鳥野色半蒼黛花園郡園夜柳暗陂塘外昏鐘
四簷雨懸燈澹予對瓶梅書帙亂茶樹窓紗礙披文到
韋集神賞希唐代爐烟起寂寞至味久不壞妻眠稚無
擾斯境非凡會於時暫得我真淨青蓮界蚩蚩競物欲
宵寐猶憎愛誰知屢空者庶遠樊籠害

春晚二首

春風爾狂顛三月不知春青青池上草翻憶夢中人幽
蘭出澗谷感此芳氣新采采不盈掬眼前但荆榛

佳花有重秀幽蘭徒自芳
姝媛被奇服絲竹羅中堂
主人惜殘春清夜未渠央
客子抱貞節泯然獨升床

看雨

荒池三月雨閑看水生文
客少苔上堦屋老樹遮門
幽心聒子綦隱几若忘言
鶯聲何從來還思借宅聞

山中雨

盈盈池上花瑟瑟花下雨
雙雙蛺蝶伴對對鴛鴦侶
池魚金作鱗魚虎翠爲羽
兀坐一山春愁獨語

走筆次韻芻父喜雨三首

薰兮有南風下此沛然雨
皇天初震怒盍燎緇黃侶
端來丹山鳳況戢螽斯羽
君詩如民謠能共天公語

青天一聲雷雲霧忽難開
此定時節至何因禱祈來客
方聽簷溜子亦倒殘杯
明朝浮舟楫尚可看楊梅

方池蔭垂柳想見蘇公隄
一雨水入床蛙部連東西
先生不能寐書卷夜自迷
穉子黎明來官路深尺泥

即席次韻景周梅花

魂來孤山青夢破耶水碧非兄孰知我非我無此客一
枝霜雪後坐斷春寂寂平生桃李場雖隣有不覲人中
具品藻醞藉李太白歲寒得佳尚賢賢以易色經年墮
塵鞅此士久乖隔昌原弗相見所謂順之逆無詩可報
答大叫脫巾幘踈花正點染半藥猶索摘

有感

隆冬都門歸偃息殊未嘗搔頭不知痒心事但荒荒頻
年借人居主者來在堂飄然十五口露處悲風霜而予

行無從寧如棄不將安巢燕飛來定穴魚蟄藏天地非
不寬一身信難量擾擾復擾擾天子誅黠羌區區復區
區早飯炊絕糧庭闌蛻骨久兄弟糊口忙親戚亦豈無
所過門如湯朋友非不多熟視第感傷欲生生無涯欲
死死無方弱妻呌欲絕三子病在床汝哭亂我耳汝痛
割我腸父母亦念我陶山永相望

次韻知縣兄夏夜古調

非禽胡能飛羽翰上青霄非木胡能花開謝隨驚颺始

予眷所生於世免塵囂頗知師甯遽貧樂富無驕異哉
肯顧我古音日寥寥介然守其業彈琴自逍遙採芣以
永晨芻藁以終宵尚思舉斯人還復溥其澆言瞻彼穹
矣維斗南之杓言瞻彼水矣維海東之潮慨然契薰兮
邈余逮虞姚

再和陶韻

紛紛流俗間哀此萬衆生陶翁蓋達士酷愛重九名行行步
東臯見菊眼爲明色香不改舊想像聞其聲謹言各攜袂

苗逮弱齡屬予剛制酒空杯與誰傾凜然北牕下清癯落驕
榮雲團煮風葉競用招我情醒醉未必爾昭氏何虧成

賢達不遺世後來肯下文玄髮一以變感此徂年凋所
懷寄絕俗泰華未爲高牛山縱尋斧何時解干霄仲尼
聘列國未覺歷日勞古今君臣義比干更茅焦皇皇上
天意一物猶甄陶清泉黃金花庶矣饑渴朝

邢兄招納涼大善以醉眠不及往大篇見嘲一

筆走和

昨宵予不飲月下看風生不飲竟大奇識此風月清今
宵予醉狂醉眼仍看月月落猶未醒思與枕簟歇從來
清涼事果爲獨士慳良月如佳人解后亦已難月色政
爾好友生偶然來此樂如此時百歲能幾回我眠不在
枕我醉不在杯平明視鬢毛定恐此物催四十餘一年
侵尋行老景人老欲何爲此話當自領大塊天地寬酒
泉歲月永非醉復非眠快活心下省

梅翁所作無一絲勉強意亦和一首

達士養四體受敵聽腹背
悉意萬卷讀往昔若晤對
日者鬢髮改自恨筆力退
得句造澹薄是亦我所愛

邢兄次韻再答之

紅塵欲欺人甚欲出塵去
人生貴險難九折有夷路
學劍劍不就學書書不成
春蠶裹於繭腐草化爲螢
高明信天資蹉跎亦步武
同床有恩怨當面分爾汝
疲容仰吾父鬢鬢憐吾兒
傳衣與養菽上下皆失時
杜甫西去秦仲連東蹈海
富貴毋相忘此意豈三代
惟君眼中人

多若古人風贈君寶劍篇謹勿傷其鋒

中秋

親朋關河濶一歲幾合并回思十載我大半短長亭我
髮日已白我心日以驚尚喜淡泊資於世少經營五日
過三縣山川知我情吟詩自娛悅俗子徒我評憶我會
心友與我同死生取我塵化衣濯我滄浪清我歸已數
日我友各有行百川我友朋五岳我弟兄我酒難獨飲
我懷誰與傾今夕我中秋我自看月明

自述一首

春糧了朝炊細大供十口身窮兩脚健天意非汝厚前
年取荆釵頗不窺戶牖甘心似黔婁習氣除夙有今年
長一女自省稱父母方其我少時豈意今老醜時平米
穀賤兄弟仍聚首先人敝廬在清話辰徂酉盍簪到諸
雛千指諒非久居然小世界榮悴同一朽去城不三里
經歲絕奔走登門亦無賓老樹堪尚友青氈古家法述
賤當自守能甘此中泉不飲富人酒

咏草

芳草復芳草青似青松樹今年見汝黃明年復如故今
來古往人南北東西路

白首

白首百歲期青春三月暮荒涼雞下柵寂寞鶯啼樹山
水越王城行人雨中去

欽定四庫全書

冷然齋詩集卷二

宋 蘇洵 撰

七言古詩

老杜浣花谿圖引

拾遺流落錦官城故人作尹眼為青碧雞坊西結茅屋

百花潭水濯冠纓故衣未補新衣綻空蟠

一作
崢嶸

胸中書

萬卷探竒欲度羲皇前論詩未覺國風遠干戈崢嶸

一作
作

終風
且霾

暗寓縣杜陵韋曲無雞犬老妻稚子具眼前弟妹

飄零不相見此公樂易真可人園翁溪友肯卜隣隣家

有酒邀皆去

莊子并蛙不可以語於道

得意魚鳥來相親

世說簡文入華林園

顧謂左右曰會心處不必在遠翳然林木不覺鳥獸禽魚自來親人

浣花酒船散車騎野

墻無主好堯李

杜詩手種堯李非無主野老墻低還是家又云堯花一簇開無主

宗文

守家宗武扶

老杜云熊兒韋無恙驥子最憐渠又有示宗文宗武兩詩宗武生日詩注云宗武小

字驥子陳無已和鏡節詠周昉畫李白真詩云君不見浣花老翁醉騎驢熊兒捉轡驥子扶金華仙伯哦七字

好事不復千金摸謂此也金華謂山谷

落日蹇驢馱醉起願聞解鞍脫兜

鍔

書太甲惟甲冑起戎注甲鎡冑兜鍔也漢韓延壽傳被甲鞬鞞注即兜鍔也退之詩邊封脫兜鍔

老

儒不用千戶侯

老杜憶昔云老儒不用尚書郎樂府木蘭歌木蘭不用尚書郎

中原未

得平安報

杜詩夕烽來不近每日報平安

醉裏眉攢萬國愁

一作清揚之間廬阜

雜記遠法師結白蓮社以書招淵明造焉遠勉以入社陶攢眉而去

生綃鋪牆粉墨落平

生忠義今寂寞兒呼不蘇驢失脚又恐新來有新作常

使詩人拜畫圖煎膠續絃千古無

東方朔十洲記煮鳳喙麟角合煎作膠名

為續絃膠博物志漢武時西海國獻膠五兩以付外庫餘半兩使者佩以自隨後從帝射於甘泉帝弓絃斷西使乞以所餘膠續之絃遂相着使力士各引一頭終不相離因名續絃膠杜詩麟角鳳嘴世莫辨煎膠續絃奇自見杜牧之讀韓杜云杜詩韓筆愁來讀似倩麻姑搔處搔天外鳳凰誰得髓無人解合續絃膠

猛虎行

君不見蜀山之高直上登雲梯
草邊路側多少豹狼蹄
盤龍山下三脚虎震天一嘯回
風低橫拖騾馬捉猪犬
咆哮出入吁無時有時人立作
氣勢團目金努矜毛皮
跳林越澗伏榛莽亦挾一子携
其妻妻兒子母誰不愛
難以人肉調其飢好生之德乃
天相殺人正自人殺之
吁嗟此虎獨三足明白罪狀人
皆知如何擊搏更不念
白晝坐使行人迷昨宵風雨振
林薄颯沓萬仞千夫隨

一夫爭先探其穴曳出斫死橋之西寢皮食肉志不厭
亦戕其母烹其兒初圖一虎得三虎頓令此類無留威
何如千山盡勦絕眼見蜀道都平夷乃知強梁不足貴
人世豈得無危機

予既賦金貂亭詩吳伯求益不已偶得名酒連
飲輒醉隨意長哦忽數十句錄而成篇真醉漢
口中語是可塞嚴命矣惜不令子大德允見之
共一醉噉耳

君不見陳留阮籍字嗣宗竹林賢者渠稱雄登山臨水
輒經日竟用酣飲全其躬謂渾汝不得復爾獨善猶子
曰仲容以其任達似叔父氣壓道北空多銅宗人共集
作園坐酌以大斗飛金鍾著言君子處域內何異羣蟲
居禪中形骸忽忘置不問豈復上欲圖三公古來賢達
類若此劉伶畢卓非凡庸陶潛數酌宦情遠李白一斗
詩情通彼胡不醒匪不智智在意表言難窮共惟遙集
乃咸嗣是飲三代傳家風五馬渡江一馬龍事未幾見

嗟江東就家拜爵下車去搖手溫嶠吾誰從京尹非才
固所願青山聽入明招終所親相顧數在念謂方醉耳
何其聰孫為知幾翁遠識信使日月垂虛空山林鐘鼎
不兩立珥貂著屐將無同解之換酒亦不惡蠟以盛足
誠為工古來醉人醉亦醒後之醒者醒而聾作亭縹緲
山水勝曳杖扶踈煙雨濛長江為杯斗為杓一飲天地
生春紅持杯却酹我遙集籍咸墳土俱蒿蓬步兵常侍
本何物目送千古歸飛鴻我今與子生並世得不痛沃

崔嵬只看祖家當時所餘兩小麓其視吳履相去何
啻億萬千千重

棲閑堂

紛紛世界多金寶試覓一閑何處討天公忌閑亦惜閑
似欲人人忙裏老長安道上人如烟信有陰陽錯昏曉
食升衣尺我類渠玉帶金魚為誰好上而公相下百官
鞅掌其身髮華皓出臨民庶或愧色歸對妻兒仍熱惱
農商工賈各有役何況倡優及輿阜豈如老龔縛屋看

青山賃地於鄰甘種稻有男肯獲女習紡布褐藜羹事
翁媼天憐老龔忙為貧報以一閑非草草乃知富貴天
不惜閑處閑人古來少問龔胡為閑處棲告以中恬外
無擾家傳古書數萬卷充棟牙籤四圍繞興來拈讀拂
蠹魚興盡留殘聽啼鳥花陰坐久看日轉葉徑行稀任
風掃問閑何味作何說口不能言心自了初從太白得
微遇晚向淵明飽問道區區擬議已不閑非作非休此
其稍我聞如是三嘆息苦恨當年歸不早閑中之味肯

見分亦欲誅茆鏡湖小

餘姚江上作先寄城中親友

開禧改歲復崢嶸老我奔馳不少寧
雪花欺人入衣袂
前日杭州今四明
老來老來我何有
綠髮黃鬚行白首
魚鱗年紀今歲是
挽之不住去如走
挽君不住知奈何
叩蓬擊楫聊高歌
天風為拍雪為舞
寒水自酌金叵羅
脚根萬里不作難
且喜看盡湖中山
明朝還舍託朋舊
尚有新詩三百首

春日懷唐梁

陳雷箭去不遺鏃後世人情手翻覆我生二十少知己
更覺恩怨生骨肉塵沙蹤跡窘吳越波浪奔馳走巴蜀
癡年自長習藝能如兔之角礙人目相公清德照宇宙
萬物引領望鈞軸平生出言謹許可愛我重我過推轂
前回識得白石生聞韶盡美一夔足此公所向泯涇渭
於我底裏罄心腹晨星在天萍在水人生失意多戮辱
東歸窮巷口掛壁豈無他人不如叔邇來唐梁亦好事

頗復顧我青眼獨吟詩造妙五七言醜媚寒松倚新竹
時時敲門小童至輟書倚火再三讀亦思賡和禮所尚
疲駕鞭扑隨驥驟歲寒相見願始終且莫嗔恠屢更僕
吾儕豈圖偏黨異俗子空猜往還熟青春飛蓋城西園
畫鷁低飛鏡湖曲杯行到手勿浪憂世界堅牢等朝燭
詹梁長驅行秣駕賤子終期老茅屋他年官達請掉頭
莫笑渠儂甘碌碌

次韻芻父大篇

我生兩脚半八區歸來狹視東南隅東南禹跡今綠蕪
百歲幾見人歐蘇聞石蘊玉川含珠山乃秀潤源不枯
胃蟠萬卷味道腴落紙所至雲錦鋪爾來大似天眷吾
貺以佳友令相娛邢子韻勝開冰壺湘湖與我初索途
謂此巨浸其是歟今夕不飲可得乎吾儕固不如林逋
吟詩寫壁無處無雜蓴便食不用厨湘湖豈即輸西湖
貰錢沽酒勞老夫酒酣肆筆衫袖烏不覺月墮三更餘
荷香染袂露濕膚開堂復駕紅塵車君勿笑人生意氣

傾堪輿所得未必如所圖

日鑄嶺下狂歌行

我生天地不如意甚欲飄然去人世却思一死胡足悲
死而不樂胡死為又思天地之間固有足樂者安得莊
周之鵬穆王馬有時騎氣或御風天上天中更天下息
駕玄冥圃駐節蓬萊宮攀星太極南訪日扶桑東東西
南北何局促自可直造混沌超洪濛又思去有歸安得
來無從當時六鼇負亦重豈有身常不轉動會須四六

二十四足一欠仲我居其高視爾衆不知化為大海水
為復茫茫而已矣不知鼈在復鼈亡為復人生或人死
此時逍遙游不見爭奪場想見四維上下俱茫茫巨鼈
爾靈便如此公欲欠伸不難耳且如皇宋三百六十州
出門所在多山丘其間平地少但見蘿蒿藤蔓上下硤
确森相膠青鞋有底踏須破人壽幾何行不休更令生
世人偏仄生戈矛迂迴隔絕千里成萬里親戚朋舊相見
朝夕無緣由爾鼈若未動為我背畧傾颺翻山與丘平

卷二
地與人行也知上天本來廣也知下地本來平只因山
丘多頓使天地輕我當作章問帝借北斗酌滄溟盡殲
偪仄人更殺馬與鵬百拜稽首祭鼇之靈

甘露歌上呈留守門下侍郎

太微淵默嚴不動斗為其車運中央四序回旋變造化
一杓直指無偏傍柄臣比之號八柱一柱難闕各有當
紹熙元年圖舊德更公玉麟使過國屹然山立天子重
列作八柱扶天極天極尊嚴物有道不減不溢常不忒

均勞於外天闕柱至今朝廷虛哀烏皇皇辟君明如日
安用動威偃禾木奉以甘露太和液飲太液親壽益公
雖老歸致太平萬物好

書懷

出門莽莽無所適青草門前少行客讀書妄意學周孔
行年三十頭雪白朝廷伏聞治清靜賤子何憂官得失
平生志氣渺江海前日詩名漫梁益相公青氈化烏有
大似不蒙稽古力恭惟元祐全盛時左右明王非列辟

爾時吾祖亦遭逢曾與坡范同入直同朝人士服該貫
後世儒生猶辟易石羊去作高資夢金榜空餘峴山宅
爛然朱紫照一門綿亘百年隨社稷中興郎從間有人
往往命薄中道塞只今晨星頗相望豈不稽首荷王澤
先人中間亦筮仕曾未幾見捐祿食坐令諸子各困頓
須與祖世事乖隔忠肝痛膽欲誰付冷屋風燈但蕭瑟
明知長短均一盡自是炎涼心所惻昨蒙宗公置牙齒
事下丞相當審覈駑才不堪駕十乘爝火或可繼殘夕

縱然得遂宜其志未免妻嫂有輕色諸兄生兒任門戶
兩弟行當問家室祖宗祭祀足依賴挿架牙籤肯終畢
至尊恭己正南面下採芻蕘及羣策男兒努力要及时
致君堯舜收故物春風吹花滿江城醉擊珊瑚夜吹笛
屬子寄傲諒茲契隱肆壺天許分席西遊酹酒弔杜甫
東望吟詩懷李白瀟湘南浮窺舜墓淮海北上巡禹迹
歸來故舊半為鬼未死一身長百疾向之經行輒夢寐
江漢沱潛猶彷彿塵埃熏人眼生翳文字不立口掛壁

樊籠日月安足恃會覓丹砂變形質時哉鵬翼倘相逢
俯仰人間訪疇昔

青牛宮

青牛宮中青草生數間老屋徒欹傾老人婆娑坐牛背
似怪關尹聞其名東來萬里西遊客倚遍宮前舊時栢
巫咸大招不可期欲向青牛問消息

再和古梅

和羹之說昔有聞豈得不如魯泮芹聞名尚救渴將軍

會稽竹箭胡能羣初花的皦美無度情事淡泊春空雲
樹猶如此人何堪再三歎息殷仲文江南晚生敬耆舊
汲水封植敢不勤清霜既降河水涸笑持雙鬢舉似君
人間涼燠易更變有底寒谷回氤氲神奇正爾出臭腐
枯木何怪生竒芬諸生徑登李杜壇此老行策伊傳勲
吾詩稱贊愧不足舉止羞澁如羊欣

湘湖飲平遠亭口占呈邢芻父

我屐欲行山路遠我舟欲泛湖水深湘湖湘湖在何許

不在天上終可尋君才未減邢居實藥品之中貴參朮
君歸芹省我湘湖夜看月明朝日出

又口占和林奇卿府教春日即事

門前車馬無行迹堂上真重戴憑席東風吹水綠芹香
課試公勤榜新拆研經未羨陸德明侯喜況有能詩聲
朝廷更化要三傑聘幣應先魯兩生休言三仕有三已
時節因緣還在是滿園桃李競紛華未害踈梅槩寒藥
皇天著意生孔顏一匙蔬飯宜加餐渺然人物望公等

斛后試挽唐虞還

金錯刀行

黃金錯刀白玉環
蘇花古血寒斑斑
皇天生物有深意
入樹伐石無堅頑
丈夫意氣豈兒女
事變虧成爭一縷
拔天動地風雨來
環響刀鳴夜飛去
世間萬事須乘時
古來失意多傷悲
嗚呼寶刀在手無
能為不知去後鬱
鬱令人思

次陸放翁韻

登高望遠不可無一日不讀書予方自委下濕地
君乃獨占高明居楊雲儻許客載酒杜陵安得錢買驢
徐行過君就書讀頗幸借屋今連閣

送孟信州去矣行

青絲絡馬黃金羈紫衣導從前驅馳男兒四十作太守
路人指點生光輝我時笑與路人說太守襟懷世人別
平生為政學魯論愛民如兒少鞭撻上饒之民吾賀君
君獨不見南安軍是家官職未渠已太后垂簾功蓋世

秋夜登湖橋


平湖秋水滿拍拍恰好三月堯花春所不同者一輪月
下上青鏡奩寒銀我來跨湖橋頂坐月照水光光照我
春暄那得抵秋清自摘霜華餐露顆

聞鶯

東村水車聲未已西村阿童喚牛起麥晴欲穩天更寒
霧雨蕭蕭熟梅子讀書牕下少人知綠陰幽草勝花時
一聲姪姪復姪姪時有黃鸝來去飛

病中排悶

中年一病一回覺
老大康寧知更難
只今四十已華髮
未到七旬應碧山
故疆風土望莫及
前輩典刑追不還
但願生生遇堯舜
耕田鑿井泰高間



欽定四庫全書

集部

冷然齋詩集卷三

四

詳校官庶吉士_臣李傳熊

主事_臣呂雲棟覆勘

謄錄監生_臣汪本中

謄錄監生_臣汪葆

欽定四庫全書

冷然齋詩集卷三

宋 蘇洵 撰

五言律詩

春日閑望

到處林園靜能來是主人
鶯喉低轉玉魚腹暖翻銀翫
雨沾芳履吟風岸角巾
功名吾老矣甘作太平民

次韻七首

隱几看魚樂洋洋圍圍然
一身隨見定萬事任從前
賣

劬更農服操觚耨紙田豈能無儉歲固自有豐年

步蹇堪扶杖頭童欲罷簪渚雲秋澹泊庭樹晚蕭森秀
穎垂千畝遥青出寸岑本來關箇事而獨可人心

昵愛經過數尊榮記憶踈賴收顏氏帖誰奉子公書西
夏方徵甲東州且定居雖無南過鴈幸有北來魚

山色對踈櫺之人一似清水邊同婦飲花下趁兒行養
帛期充膳騎牛學治生時因把鋤暇毋廢讀書聲

香醪如蜜甜村酒漸多添弄水間移棹看山自捲簾深

心非木石癡腹慣齏鹽莫作淵明解逃魚本欲潛
茅茨依橘柚鄰舍即烟波更與山為伴何憂屋不多功
名元有命嗤笑亦從他但願年年熟杯來爾汝歌
廢田為屋宇困士學農桑來者或相問耕焉安得堂為
言吾欲醉且去客無妨信有癡人夢寧甘草徑荒

一室

一室星辰入平居社稷憂螢飛原有夜蟬遠不勝秋短
髮千方誤中年萬事休摩挲門外柳坎止亦乘流

遣熱二首

人生萬家室大暑亦勞勞
滴露點周易臨風歌楚騷
朱丹誰復羨斑白懶能薊
一笑問兒子汝何催我曹

田舍東湖隔樓居北戶升
感時秋鬢白懷友晚山青
病不妨書讀閒應養性靈
敝裘蘓季子四海一飄萍

客夜

風雨夜冥冥舟行為小停
野田藏水白燐火出墳青
將子鴈能急久鰥魚獨醒
人生貴艱阻稍向道塗經

歲杪

客子船都泊幽人夜獨醒
五更初水長四壁盡歌聲
已若從吾好因之念此生
行年半七十歲事復崢嶸

舊歲

舊歲無多日三衢有幾程
雪簷踈滴滴泉溜響泠泠
奔走經年債襟懷一味清
紀行吟放穩歸詠遣兒聽

秋夜有感

燈影三更夜蟲聲四壁秋
雨堦踈滴滴風幔颯悠悠
朋

友新凋喪湖山舊釣游平生匡復志老去未能休
樓上幾當當殘更引漏長月明山樹濕露下藥苗香朝
野衣冠異郊原故物傷平生三徑草此夕更蒼涼

世事

世事一翻手詩書三折肱江湖多白雨魂夢雜青燈同
好纔如此言歸有未能平生飛動意元不羨鸛鷹

書憤

黃葉冷飈颼臨風搔白頭江湖無老伴天地有新愁索

禁行駕曉揄關戰馬秋平生忠孝意到死不能休

琢句

琢句真無益論詩新有名客懷無遠近人事只翻騰積
水明寒樹饑鴻咽夜聲半年安坐得又作雨中行

懷親堂

升堂知孝子即事每思親根本由先世栽培得後人
林香自好四序感如新勿作商顏戀家傳漢幄臣

涼意

涼意滿中庭乾坤洗濯清鵲河通海浪螢火亂天星便
覺黃花近休看白髮生客床眠不穩起坐聽秋聲

仰屋

仰屋無窮事甘心未遇時雨花明燕羽風葉墮蛛絲農
務從人說光陰類箭移早知霜白鬢那免一生癡

得屋後舟中作

棄大屋
從小屋

有屋吾堪老無田子緩求長江惟可飲萬事不須謀政
爾天從欲端因鬼瞰憂平生晏平仲能費幾狐裘

幽興

花氣濕書籤琴風入畫簾綠陰連地黑朱果落枝甜客
去從鸚鵡語人歸問鵲占村居近城郭幽興得相兼

即事

窗外梧桐樹霜風特地吹莫輕初下葉長別所生枝便
有青蔥見應無歲月追先人移得汝吾鬢復如絲
平生蘓季子歲晚意何如收拾江湖夢歸來田舍盧緹
鋤知力腐書卷著饑驅稍識瞿曇老長思結習除

羣雞紛啄粟收斂逼深秋巷內黃葉落門前清水流年
饑人菜色家弊僕蓬頭兼善平生志淒涼出謬悠

有感

衆木曉森森孤松自百尋絕知根氣大能受雪霜深草
草供時役悠悠匪力任春風遍紅紫啼鵲便驚心

有歎

古屋殘僧住孤墳亂蟻穿山稜人踏減灘石浪搓圓毀
譽無終日功名有百年予方韋壯歲渠得戀華顛

氣使與形驅從知萬化渠參禪休佞佛為士盡忘書枉
鑄千金錯終還一味愚柴門老翁媪圍坐却安居
杵臼梁鴻事人間欠此人癡兒號飯少愁婦厭家貧雨
障雪來晚梅催柳逐春平生兼善意孤獨歎沉淪

陶令

陶令歸來後何人記若翁難將五斗粟換此一窻風喜
色均童稚高情更菊松悠然信天命今昨定無同

偶題

少壯憂藜藿堆盤齒豁踈平生空布褐垂老賸金珠世
有伯勞燕人誰能掌魚癡年將半百撫事已嗟吁

偶作

盤薄意無窮藏修一畝宮竹鳴知過雨花動覺微風閒
作詩如畫長思色是空人言類摩詰雖病有神通

夜讀老杜星月詩二十首

肺胃清如洗脩然二十詩月星連北斗冰雪繞南枝煮
壑充茶椀烹龍送酒卮杜陵天上語舉世幾人知

重憶舊句

太飽傷清氣微寒最好詩
白鷗沒浩蕩天馬謝羈維
矯真無敵飄飄信所之
百年龍變化萬事燕差池

予頃時有一聯云太飽傷清氣微寒最好詩
葛天民極愛之偶再續成

太飽傷清氣微寒最好詩
輕鷗憐野性垂柳讓風姿
智巧從天賦疎狂聽我為
極知貧者病未許藥能醫

無題

愛酒陶彭澤能詩陳後山浮沉將底用長大若為顏鏡
面舟一葉梅邊屋數間饒君雙鬢白還我半生閒

得句

存養龜傳息扶行鶴類形題詩憲紙白住舍竹林青食
淡神偏爽眠稀夢亦靈從來知守分真箇勝看經
馬步山逾險舟行水未通馭風為道號嚙雪是家風自
許清如玉從教臭似銅人生幾兩屐老去一飄蓬

再次送芻父韻寄之二首

君到知何日書來未可疎旅情難是久別意重於初時
暑方遵涉齋居少自如梁空明月夢只有不關渠
當時馬首東追送苦苦匆匆對我藕花雨思君榕葉風畏
途迷白黑醉眼眩青紅曷日歸相問江湖一釣翁

走筆次韻黃觀復學士二首

未見心先識相逢意輒同半生纔得此叔世若為容力
學君方壯緣愁我已翁泥塗斷還徃信矣命之窮
自嘆馮唐老那堪李廣奇歲寒斯可矣吾道竟何為麗

日明桃葉清風近竹枝天機乃人事到底孰成虧

見放翁退

住所真容膝談間便解頤胡能萬事足直作一生癡密
雨驚荷葉微風吹竹枝回舟吾自憊應賦此翁詩

次知縣兄韻

市少全依郭人稀却似村湖山春氣早烟雨畫圖昏倚
樹花微落吟詩酒屢溫親朋各南北步履款誰門

次韻葛天民

搗栢為香炷煎茶當酒杯鬢因兒女雪心向利名灰茅
屋湖邊住紫扉柳下開殘年未歸去排日為公來

簡寄

綠樹千家雜青山四郭新須知太守印合付謫仙人波
浪窺東海樓居近北辰不過行儉德彼瘠本王臣

簡朱子大學士二首

亭上經秋宴同鄉見亦難鬢從前度白楓是此回丹句
法流傳否交情寤寐間重來興不盡誰掉小舟還

人間三十六曾未識朱園一昨袁然飲通宵謝屐痕厨
燈猶琢句山雨未移樽子大真吾敬心期重款門

憶朱子大學士一首

翠麓晚蕭騷無風樹亦號官榮歸若輩詩態憶吾曹信
有憂能死應無酒可陶平生相照地不隔半秋毫

歸自陶山舟中示暹姪

鐘聲四山晚一舸鏡中歸遠舍火明樹寒天露濕衣塔
高城不禁林暗鳥疇依有句傳猶子吾疎合世違

憶黃觀復

地遠過從少天多眼界寬
曉書繙卷白秋桂繞亭小
雨妨相覓幽花孰與看
平生杜陵老到此賦詩難

陳杰荊州之役伯文實約予聞其沒官愴甚不
寐遂成詩

細雨歸帆暮西風遠笛哀
江空人永已興盡首重回
嗣祖焉非福王生本不來
從今長謝客穩卧北山隈
紫芝申之有月夜賡唱俾予續之

樓高發興微山水自清輝有月畧窺枕無風時動扉他
生嫌火食投老羨空飛安得余廬趙相從去不歸

陪制帥寶學侍郎飲別金陵諸勝地

制閫三年名亭臺一日違江山雲外款鼓吹月中歸夜
氣輕杯力霜稜迫妓圍明當趁朝謁回首此依依

重送呂知錄表叔

別味中年畏離筵近日頻青山千騎遠綠樹一蟬新典
獄須吾表窮涯亦我民時因過周守相與話推仁

遠懷

縹緲龍泉伯人間第一流胡然天下寶只頓海東頭斯
道誰興廢浮雲任去留絕知他日少預作百年憂
去國三千里書來一再行過從應夙數契濶更殊鄉沙
草留徐步溪鷗傍晚涼人間無限事獨自有難忘

次韻芻父秋懷

髮短日益白眼昏時見花無人知若士有句可雄誇籬
菊風前蕊山梅雨後葩平生蘓季子猶足送年華

幸免名為累應無口啓羞竺書時掛眼衲被久蒙頭未
仕胡三已論才宜四休商宗如見夢依舊濟川舟

太史龜堂上重來不忍看更無時往復徒有竹平安世
事翻仍覆人情燠易寒何時一樽酒同訪小方干

逢人惟婢直遇事懶依阿菊引陶彭澤鳶驚馬伏波衰
年如意少行路得詩多彼其皆車服嗟嗟如命何

士有修身者娟如女在房刈蘭供作佩採菊當為糧春
樹翻疑雨秋花却耐霜從來興涉意晚棹轉微茫

四十纔如此將來事可吁長齋甘短褐舊債壓新租已
覺身何有行當夢亦無茅簷負朝日黃卷足相娛

陋室詩

陋室行蝸子良朋斷馬蹤一官當面過萬事轉頭空故
有詩驅瘡那無檄愈風豐年仍儉食歲晚得逢窮

即席呈趙大資

裴公非綠野白傅喜青山富貴何如老功名不似閒半
生知己地每見立談間歲歲湏來省從教載雪還

寄衛太常二首

道義分明重功名取次休重來踏龍尾猶記立螭頭行
輩雲霄上家山歲月周孰知為郡樂未憚過都留

祖世多生契門墻半面人若為資巨獄不敢望洪鈞千
載今如此諸公迹易陳江河湏到海松柏不勝春

寄盧子高二首

我別君逾壯君來我欲翁艱虞疇昔異風雨數宵同鶴
病祇應瘦鷹飢怕苦籠平生黃叔度見可俗塵空

君行甫郭門我病已昏昏嘔泄輒經日芳鄉空屢飡每
思今古易終畏別離煩向匪勤車馬何因共一尊

問訊知府高校書

為問高夫子朱黃想校書有詩連日有無訊十分無月
淡梅行色窻寒竹寄居惟應牙痛愈列屋任閒渠

次韻高秘書謁陸待制二首

人物推前輩聲名重泰山斯文無毀譽吾道有間關袖
短方妍舞弓強愧力彎風舟雖屢引中路忍追還

海上三神宅人間陸放翁談諧詩雅詠任已易屯蒙松
竹當姬侍鷗禽是僕童後來那可計應有不如公

東墅次高秘書韻

累土就川池蜉蟬半黠痴神僊愚谷賦圖畫史君詩石
磴春風酒松窻夜雨碁仲謀真有子狔犬定吾兒

與趙監簿

昔我離家日今皇即位年同時辭北極共載入西川雪
裏賡詩句江邊醉酒船重來一訪舊風景故依然

足姜句

那知身百歲未辦屋三間見客慵開口逢僧託買山喜
無他志願幸不碍清閒社燕秋鴻裏人生各有還

次知縣兄曹娥渡句

自絕雙魚養愁登老檣亭斷雲知意緒流水付年齡撫
穉頭空白逢人眼未青貪生不既晚無地學威靈

五次韻送蹈中造朝

鏡曲春帆遠延和曉仗穿已更新歷日休問小行年用

我書三篋從渠食萬錢功名今古意留眼看蒼天

問訊耕堂

五更三尺雪應是沒耕廬洞徹八窓景泓澄一腹書卧
看龍天矯聞翫玉糲糊差勝陳家否妻兒共擁爐

寄趙紫芝

同年今半百同病半年賒瘦骨如枯木殘身類晚花人
言關念慮書字覺欹斜且願逢靈藥清吟老鬢華

寄周晉仙

四海周風子推敲孰似渠
官應憎骨相老不上髭鬚
醉帽歌花落吟身信杖扶
相思不相見梅樹雨鳩呼

見子大後寄

相過自一奇歸去復相思
柳上已春意屏間如杜詩
山川佳甚處人物眇然時
愛重非金玉微君不我知

寄常山晉叟兄

行人有公論知縣得奇才
祖世今衰矣吾兄亦壯哉
可能千里到不破一朝來
當日王猷興真成訪戴回

代書寄應之舅

故人天一方鴻鴈已南翔世亂各生死年饑無稻粱丁
寧機上錦愛惜橐中裝莫作孤飛想冥冥忌弋傷

寄穎季

人來得一書分袂兩旬餘未擲劉差驚誰羨宋嫂魚時
情分向背同氣底親疎想見迎長節杯行會憶渠

代書寄趙處州公甫

茗雪無來使如今又幾時案餘分惠筆室有寄來詩豁

達偏憐我風流更許誰懷哉括蒼小安用借留為

因會薛船官寄子高

昔忝盧郎舊因尋薛子舒淺交初未愜重見極相於嗜
好三人共參商十載餘長安燈月酒吾與汝憐渠

先寄觀復

老去真無幾為官又不成慙慙驅病體端的為交情人
以風姿勝梅將雪意爭知君定懷我株坐或遐征

送錢子望

才名富有餘揮袂別鄉閭小作經年計輕賫一束書州
城蕉葉暗驛路菊花踈尚想南來使時因問起居

送陳永康昌年

公不登臺省猶宜立內朝如何百里縣更以一身遠俗悍
湏寬理年豐在政調清秋送卓茂目斷馬蕭蕭

送趙蹈中府簽對策大廷

輿學通玄象湏時對廣廷端為賈生策動合聖人經事
往誰謀始時今未救寧因留非所志君相眼終青

壽暹姪

行年過二十不可恃青春再此為中宿三之即老人詩
書先足已壽祿後榮親當日癡頑叔從師雪水濱

贈暹姪

祖世青氈遠關門鬢欲絲猶欣諸子姪愛覓老夫詩貧
賤端由此文章安用為勉哉勤所業須有中興時

思故人

故人不可見書札報平安黃菊誰能折青山獨自看雨

生南浦足秋入五湖寬歲晚無多事相看把釣竿

感舊

連年走巴蜀性命實如絲去有身將影歸無父惜兒車
馳遭虎豹水宿伴蛟螭少待波瀾濶須吟憶昔詩

荊州若箇伴錦水暮雲深萬里元無事一生長苦心秋
林猿弔影春殿鳥遺音尚喜身強健幽期或重尋

復簡蹈中

庭樹風吹盡池荷雨滴穿病身能幾日短褐過殘年摘

藁有千首看囊無一錢雞號喚清曉惜許夢鈞天

簡德允

言歸四十日兩度得尋君貧病有諸子情懷無半分梅
花年後雪雁翅屋東雲早晚扁舟興能來與細論

簡紫芝

一隻林家鶴饒君骨更清愛山幾廢日琢句恐傷名稍
得湖邊住常來寺裏行相逢恠相喜同病又同庚

哭邢弼父六首

頤養花能秀謙卑玉似溫當家衣鉢受外氏典型存逸
驥方開路歸雲遽斂昏曾中何事了地下與誰論

未晬俄孤子垂髫便俊聲深知表獨立敢謂竟無成嗜
好惟經史情親到友生回看真夢幻未必泯神明

江漢淵流遠芝蘭雅韻深規行真畏友莊語賸開心未
悉昭昭理長懷秩秩音且隨賢父寔應伴放翁吟

在昔呻吟作於今族姓無致身胡不可得壽有相湏鬼
魅資強黠乾坤惡好儒黃陳諸老淚何獨為惇夫

慟哭叫蒼天其如手足然幾年能爾熟一日棄子先委
翰愁肱篋膺詩歎絕絃求兒方畫祿有母況華顛
太學三旬食邢家萬事空初頭纔過我半後已無公慙
恍扶床語倉皇就木終從今顏巷冷寧復孔尊同

再省剡姊

短景催長至冬溫為小春昔遊今更省母逝姊為親風
木悲吟楚晴沙巧繻秦扁舟君莫羨未必自由身

足疾數日簡潁弟

病脚冬逾甚羈懷老自驚生前終有役隱去更湏名褐
短愁紉婦文踈愧屬兄何時了婚嫁一意學躬耕

簡趙紫芝

別久似相忘因行遇道傍問知元姓字傳讀是文章鶴
骨秋逾瘦松身老更長十年猶九品如我合耕桑

壽賴季

有屋湏生子為家要及時雲山千態度弓冶幾書詩壽
日能佳事秋風况捷期長年一杯酒吾與菊花知

除夕呈主人

使節梅花外椒盤淚眼邊山川非故國笳鼓咽新年機
事鷗偏覺家書鴈不傳細箋今夕恨萬一主人憐

送觀復機宜榮侍南遊二首

友誼平生少心期遠近同畧無時俗氣信有古人風幾
諫知吾子忠言在若翁南州須趣召先寄狀元紅

命拙仍多故君來每慰情艱虞還儉歲文字久寒盟又
作家山別寬為數月程閑門閉蕭瑟病眼向誰明

十二月二十八夜至此悵然繼和

病馬猶依櫪飢鴻更著行
深宵風雨後萬里道途長
骨立難看鏡愁來怕舉觴
少年輕聚散曾笑客思鄉

重哭周四

甫讀宗周挽那知遽絕絃
所嗟無我輩不獨在詩篇
行到水窮處魂傷山寂然
灰寒空酌酒慟哭向蒼天

二十三弟喪偶慰之

汝婦真良偶吾家無間言
生來諸澹泊奪去幾煩冤
室

想羸鰥慕牀餘稚乳存羈遊違一算何日送丘原

挽故開府節使觀文趙公二首

杵臼孤無食詩書卒致身佩琴重化蜀衣錦却歸鄆不
廢先君養難忘舊日貧公卿如匹士伯父更何人

觀文終身

有養
親錢

綠鬢今如雪陪行萬里長稍從師北面重作婿東床道
義非常重精神有不忘一為天下慟端復細思量

